



ЎЗБЕКИСТОН ПРЕЗИДЕНТИ РОССИЯ ДЕЛЕГАЦИЯСИНИ ҚАБУЛ ҚИЛДИ



Ўзбекистон Республикаси Президенти Шавкат Мирзиёев 25 март куни Тошкент халқаро инвестиция форумида Россия делегациясига бошчилик қилаётган Россия Федерацияси иқтисодий ривожланиш вазири Максим Решетниковни қабул қилди.

Учрашув аввалида Максим Решетников давлатимиз раҳбарига Россия Президенти Владимир Путиннинг салом ва энг эзгу тилақларини етказди ҳамда Тошкент форумининг муваффақиятли натижалари билан самимий табриклади.

Кўп қиррали Ўзбекистон — Россия ҳамкорлигини кенгайтириш бўйича олий даражада эришилган келишувларни амалга ошириш масалалари кўриб чиқилди. Саннат кооперациясига доир аниқ лойиҳаларни илгари суриш ва ўзаро савдо кўрсаткичларининг ижобий ўсиш суръатларини таъминлашга алоҳида эътибор қаратилди.

Ўтган йил якуни бўйича икки томонлама товар айрибошлаш учдан

бирга ортиб, рекорд даража — 7,5 миллиард долларга етди. Жорий йилнинг биринчи ойларида савдо кўрсаткичлари 50 фоиздан зиёдга ошди. Бугунги кунда Ўзбекистонда 2 мингдан ортиқ қўшма корхона муваффақиятли фаолият юритмоқда, Россиядан иқтисодиётимизга жалб қилинган инвестициялар ҳажми 10 миллиард доллардан зиёдни ташкил этмоқда.

Учрашувда икки мамлакат ҳукуматлари даражасида яқиндан ҳамкорликни давом эттириш, шунингдек, Ўзбекистон ва Россия ўртасидаги иқтисодий ҳамкорлик бўйича ҳукуматлараро комиссия салоҳиятидан самарали фойдаланиш муҳимлиги таъкидланди.

ЎЗА

Ўзбекистон Республикаси Президенти
Матбуот хизмати сурати.Ўзбекистон Республикаси Президентининг
ҚАРОРИПАХТА МАЙДОНЛАРИДА ТУПРОҚ
УНУМДОРЛИГИНИ ВА ҲОСИЛДОРЛИКНИ
ОШИРИШ, СУҒОРИШНИНГ ЯНГИ
ТЕХНОЛОГИЯЛАРИНИ ЖОРИЙ ЭТИШНИ
Қўллаб-қувватлаш чора-тадбирлари
тўғрисида

Пахта майдонларида тупроқ унумдорлигини ва ҳосилдорлигини янада ошириш, суғоришнинг янги технологияларига ўтиш, ўсимликлар ҳимояси бўйича хизматларни йўлга қўйиш, замонавий лабораториялар барпо этиш, фермерларни ўқитиш каби тадбирларни рағбатлантиришнинг таъсирчан механизмини жорий этиш мақсадида:

1. Иқтисодий тараққиёт ва камбағалликни қисқартириш вазирлиги, Молия вазирлиги, Қишлоқ ҳўжалиги вазирлиги, Давлат солиқ қўмитаси, "Ўзбекистон пахта-тўқимачилик кластерлари" уюшмаси, "Ўзтўқимачиликсаноат" уюшмаси, Ўзбекистон фермер, деҳқон ҳўжалиқлари ва томорқа ер эгалари кенгашининг қишлоқ ҳўжалиги ерларидан фойдаланувчи (ижарачи)лар томонидан пахта майдонларида тупроқ унумдорлигини ошириш бўйича амалга ошириладиган тадбирлар учун Давлат бюджети маблағлари ҳисобидан 2022-2023 йилларда синов тариқасида рағбатлантиришнинг қўйидаги механизмларини жорий этиш тўғрисидаги таклифи маъқуллансин:

тупроқ унумдорлигини ошириш ва эрозиядан муҳофаза қилиш тадбирларини амалга оширишнинг учун солиқ имтиёзлари бериш;

тасдиқланган ер тузиш ҳужжатларига мувофиқ қишлоқ ҳўжалиги ерларини тиклаш, қайта фойдаланишга киритиш ва янгидан ўзлаштириш, қишлоқ ҳўжалиги ерларини рекултивациялаш ва мелиорациялаш тадбирларини бажариш учун субсидиялар ажратиш ва ер солигидан қисман озод этиш.

2. Шундай тартиб жорий этилсинки, унга мувофиқ 2022-2023 йилларда синов тариқасида:

а) тупроқ унумдорлиги ва пахта ҳосилдорлигини ошириш, илмий асосланган алмашлаб экишни ва суғоришнинг янги технологияларини жорий этиш ҳамда ўсимликлар ҳимояси бўйича хизматларни йўлга қўйиш ва замонавий лабораторияларни барпо этиш, шунингдек, деҳқончилик соҳасидаги янгиликлар ва илғор тажрибалар бўйича фермерларни ўқитиш учун ердан фойдаланувчи (жумладан, кластер) ларга Давлат бюджети маблағлари ҳисобидан ҳар бир гектар майдонга бир миллион сўмдан субсидия ажратилади. Бунда:

пахта майдонларида тупроқ унумдорлиги ва ҳосилдорлигини ошириш бўйича тадбирларни бажариш учун дастлаб ҳисобланган субсидиянинг 70 фоизи ажратилади;

субсидиянинг қолган 30 фоиз қисми ҳосилдорлик олдинги маъсумга нисбатан ўртача 15 фоизга оширилиб, Давлат статистика қўмитасининг таҳлилий маълумотларида ўз аксини топганда, ўтказиб берилади;

б) пахта майдонларида тупроқ унумдорлиги ва ҳосилдорлигини оширишнинг учун солиқ имтиёзлари тупроқ бонитировкаси таҳлилий натижалари бўйича тупроқ унумдорлиги ошган ердан фойдаланувчиларга татбиқ этилади. Бунда:

ердан фойдаланувчилар учун ер участкаси тупроғи бонитет бали амалдаги бонитет баллга нисбатан 3 баллгача ошган ҳолларда ер солиғи ставкаси 25 фоизга, 3 балл ва ундан ошган ҳолларда 50 фоизга камайтирилади;

ер солиғи бўйича имтиёзлар уч йил муддатга амал қилади.

▶ Давоми 2-бетда

“ЎЗБЕКИСТОН ВА ТУРКИЯ
ОМОН БЎЛСИН!”

Ўзбекистон ва Туркия ўртасидаги дипломатик муносабатларнинг 30 йиллиги ҳамда олий даражадаги стратегик алоқалар ўрнатилганининг 5 йиллигига бағишланади.

Менинг тилим — қуш тилидур,
Менинг қўлим — дўст қўлидур.
Мен булбулман, дўст гулимдур,
Билинг, гулим сўлмас менинг.

Юнус Эмро

Мақоламизни бошқа ном билан аташимиз ҳам мумкин эди. Лекин айнан ушбу сарлавҳада тўхталишимизнинг сабаби бор: 2021 йил Адана шаҳрида нуроний бир ўзбек онахондан дуо олар эканми, унинг қалбидан дур каби тўқилган эзгу тилақлар қатори "Ўзбекистон ва Туркия омон бўлсин!" деган сўзлар бизни қаттиқ тўқинлантириб юборди. 92 ёшли Саодат аянинг ана шу самимий дуосида ўз оила аъзолари билан бирга бир пайтлар турли сабаблар туфайли турк заминидан бошлана топган минглаб ўзбекларимизнинг ҳам тилақлари мужассам эди. Бу ҳақда мақоламиз охирида яна тўхталамиз. Келинг, дастлаб бу йил 30 йиллигини нишонлаётганимиз ўзбек-турк дипломатик муносабатлари, ҳамкорлик алоқаларимизнинг бутунчи ҳолати ва истиқболлари ҳақида фикр юритайлик.

Туркия ҳақида гап кетганида, халқимиз доимо миннатдорлик билан эсга оладиган бир ҳақиқат бор: Ўзбекистонимизни жаҳон майдонида мустакил давлат сифатида биринчи бўлиб тан олган давлат айнан Туркиядир. "Жигар — жигар, дигар — дигар", деганларидек, ёш мамлакатимиз халқаро муносабатлар дунёсига қадам қўяр экан, аввало, азалий қардошимиз Туркия чин дилдан қўллаб-қувватлаш ҳақида фикр юритайлик.

Мен элчилик фаолиятим давомида шунга амин бўлдимки, 70 йиллик собиқ шўро тузуми даврида турк қардошларимиз бизнинг миллий

истиқлолимизни интизор бўлиб кутган, орзу этган экан. Ушбу руҳни ўз халқига Туркия Жумҳуриятининг асосчиси Мустафо Камол Отатурк сингдириб кетган, десак, тўғри бўлади. 1933 йилдаги бир нутқда Отатурк совет империяси ҳақида тўхталиб, "Вақти келиб, СССР ҳам худди Усмонийлар давлати, Австрия-Венгрия каби парчаланиб, бўлиниб кетиши мумкин... Шундай замонлар келганида Туркия нима қилиши кераклигини билмоғи шарт. Бизнинг тили муштарак, келиб чиқиши бир биродарларимиз бор. Уларга кўмак бериш учун тайёр бўлишимиз зарур", деган эди. Турк қардошларимиз ана шу сўзларнинг амалдаги ифодаси сифатида Ўзбекистонни юртимиз мустақилликка эришган биринчи кунлардан бошлаб қўллаб-қувватлаб келмоқда.

Ўтган йили мамлакатимиз истиқлолининг 30 йиллигини кенг нишонлашга бағишланган қабул маросимида Туркия Республикаси Президенти Бош маслаҳатчиси Ялчин Тўпчу жаноблари бир фикрни алоҳида таъкидлаб айтган эди: "Мустақиллигининг 30 йиллиги билан қўтлайман. Шу билан бирга, мамлакатингиз замини 3000 йиллик давлатчилик тарихига эга эканини алоҳида қайд этмоқчиман. Ҳатто бизнинг кечмишимиз ҳам сизларнинг тупроқларингизда ибтидо топган. Биз бу ерларга кўчиб келган бўлсак-да, Мовароуннаҳрнинг маънавият булоқлари асрлар давомида Онадўли муҳитини суғориб келган..." Тўпчу жанобларининг ушбу сўзлари



чин юракдан айтилганини турк жамиятининг ичига кирган, оддий турк фуқароси билан мулоқот қилган ҳар бир инсон сезади, ҳис этади. Мамлакатимизни янада кенгроқ танитиш мақсадида Онадўли бўйлаб амалга оширган 50 дан ортиқ хизмат сафарларимизда бунга тақрор ва тақрор амин бўлдим ва бўлмоқдаман. Чамаси, 2019 йилнинг бошида Чўрумга зиёрат вақтида маҳаллий расмийлар ва тадбиркорлар билан учрашувдан сўнг оддий бир турк оиласида меҳмон бўлдим. Сўхбат давомида Ўзбекистоннинг муқаддас қадамжолари, "Етти пир" зиёратгоҳлари ҳақида ҳам гап очилди. Шунда оиланинг кенжотайи ўғилчиси "мен ҳам олтин селсилани биламан", деб Бухорода мангу ором топган валиларимизнинг номлари ва фаолиятлари ҳақида айтди. "Сизга ким ўргатди буларни?" деб қизқидим. Болакай ёнимда ўтирган отасига ишора қилди. Айни савол ифодаси билан боқганимни англаган Мансур Бей Абдуҳолик Ғиждувонийдан Баҳоуддин Наҳшбандга қадар бўлган азиз авлиёлар шажарасини бобосидан эшитгани, улар ҳақида ўрганганларини ўзи ҳам

фарзандларига етказгани ҳақида фахр билан сўзлай бошлади...

Албатта, бундай тарихий, маънавий-руҳий яқинлик — минглаб йиллар давомидаги жараёнларнинг табиий натижаси. Бугун минглаб километр йироқда бўлган турк қардошларимиз билан қачонлардир бир бешикада улғайганимиз, бирга вояга етганимиз — айни ҳақиқат. Қорахонийлар ва Салжуқийлар ҳукмронлиги вақтида қўшни бўлган, Алоуддин Самарқандий ва Абу Бақр Косоний каби алломаларимизнинг Онадўлига келиб, олимлик ва элчилик фаолиятларини амалга ошириш тарих китобларида битилган. Юқорида эслганимиз "Етти пир"нинг бош бўғини — Абдуҳолик Ғиждувоний ҳам Туркиянинг Малайтиясида Бухорога келиб ўрнашган оилада ўсиб-улғайгани, Мирзо Улўғбекнинг яқин шоғирди Али Қўшчининг Самарқанддан Истанбулга бориб, Аё София мадрасасида дарс бергани каби ўзаро илмий-маънавий алмашинувларимиз чуқур илдишларга эгадир.

▶ Давоми 3-бетда

